

## San Giuseppe te L'Azzareddhu

L'annu passatu propriu te stu tiempu,  
me truvai na sira sutta u cumentu,  
sta mprumintia na sciurnata a nu caruseddhu  
quannu va me ricordu ca era Festa a Lazzareddhu.

Te pressa, scancannu, me ne scei a casa,  
me misi i cazzi novi e na camisa spasa,  
null'ha stirai, nu truvai lu scarfasettu,  
alla festa scei, cu sentu poesie in dialettu.

Mmensu a tanta gente, va ccappu rretu,  
annanzi a mmie nu vagnone ca nu stia mai quetu,  
cu na mano intru u nasu, me paria u Fioravante,  
va se gira e ne visciu ddo nasche tante.

Mentre sta sentia versi in dialettu,  
a verità qualchetunu m'ha fattu effettu,  
cibboi, tra stu ndoru te vigne, terracate e Chiesa,  
ippi alla fine na beddha sorpresa.

Piia e bisciu tuttu ncotu nu proiettore,  
susu na machina, quammensu ffore,  
Matinu, S. Parmeta, S. Latteriu, S. Anastasia,  
e la uce tu Totò ca spiecava e ca ticia.

Versu la fine, mentre stiene tisi,  
va me scattu forte forte te risi,  
intru i film zziccu bitire certi cristiani  
ci be ticu i nomi mancu li cani.

Va bisciu u Casombula, lu' peti te siu'e lu Fiotu,  
lu tre caddhi, la Sicchetta, e lu Caliotu,  
lu Mecu, lu Cacachesie e lu Nsù,  
e fenancu la "Rosa numbole Gesù".

A Lazzareddhu, mmenzu ddhe cinque vie,  
nu sse ponnu tire chiui buscie,  
quiddha è terra russa nun è chianca,  
data te lu Zoppiteddu ca osci manca.

Pareddhu sutta terra se ritrova  
topu ca ne tese a terra pe la Chiesa nova  
tutte quiste ca sta dicu su cose vere  
addhai la missa la tice sulu don Alfieri.

Ma lassamu nu picca sti giudizi,  
e pensamu allu monucu Leopizzi,  
liti lettu ddhu libru su Matinu?  
Uei vagnuni, ci Matinesi simu?

E le poesie tu Cuntineddu u "Romanu",  
tu Toniu Ingrossu, tu Giannicu Giordano,  
quillhe tu Fusaru, te l'Edmondo Angelè,  
San Giuseppe fanni bbona stannata ottantatré.

Aggiu spicciatu te tire sta puesia  
perchè u Comitutatu m'iae prumisa na fesseria,  
m'iae tittu ca cinca recita e nu sbaia  
ne taie na coppa o na metaia.

Ci uliti propriu cu be ticu tuttu,  
ieu te le metaie e le coppe me ne futtu,  
basta stau bbonu e cu campu povareddu,  
cullu iutu te S. Giuseppe te Lazzareddhu.

## *Totò Fusaro*